

謹言慎語

經文：雅各書 3:1-12

09-17-06

這幾禮拜 ê lectionary 所選 ê 經文攏是用基督徒品格作中心。作 1 ê 傳道，講道設使 m̄ 著，會引 chhōa 信徒信仰偏差。人攏有偏見 kap 主觀意識，常常因為固守家己 ê 意見分離教會，親像：浸禮或洗禮互浸信會出走、聖餐是象徵說 iáu 是合質說互路德會 kap 長老會分裂，所以咱講話 ma 愛慎重，也著尋求聖神 ê 幫助。兩禮拜前學青團契聚會時我講啓示錄導論有青年問講：啓示錄 chiah-nih 濟解釋法我怎樣知我選 ê 是對 ê? 上帝互咱有自由意志 ē-tàng 選擇家己信仰 ê 方式，總是按怎 chiah 是正確 ê 著靠咱信心 kap 智慧來抉擇。耶穌講：「所以見若聽我 chiah-ê 話來行 ê，beh 比並知識 ê 人，起伊 ê 厝 tī 石磐頂；雨落，大水到，風吹，衝著 hit 間厝，亦無倒；因為地基佇石磐頂。見若聽我 chiah-ê 話，無行 ê，beh 比並躉人，起伊 ê 厝佇沙頂；雨落，大水到，風吹，衝著 hit 間厝，就倒；koh 伊 ê 倒是傷重。」咱 ê 信仰著起造佇主裡，mài 因為風吹雨落或是人 ê 胡亂講有所動搖。

基督徒一方面 bō 愛聽人 ê 胡亂講，全款也著謹慎家己 ê 言語。雅各講：「hiah-ê 船，雖然 hiah 大隻，互大風掃伊，猶原是用細細 ê 舵互伊轉越，照舵公意思所愛(3:4)。」講出去 ê 話 mà 全款，有時因講 m̄ 著一句話傷害著別人，可能一世人攏無法度修 siàu。第五節講：「小可 ê 火燒樹木 jōa 濟 ah!」舌 ná 親像微弱 ê 火星，卻 ē-tàng 起大火。大火能燒真濟文件，卻也 thang 以燒聖神 ê 火，光 mà 照烏暗中 ê 人。我真歡喜托爾斯泰 ê 小說，伊識用馬太 18:21-35 為底本，寫一篇小說「小可 ê 火燒樹林」。故事發生佇小鄉村 ê 兩農家，這兩家佇 In 老父 ê 時，兩家真好，總是到 chi 代漸漸發生摩擦，伊凡(Ivan)行動不便 ê 老父一直苦勸伊愛和好。有一工 Ivan 厝裡 ê 人到隔壁尋一隻失落 ê 雞母，卻遇著隔壁歹話對待，Ivan 厝裡 ê 人 m̄ 甘認輸，mà 罵倒轉，了後衝突不斷。當時，Ivan 老父一直要求 kiáⁿ 退一步 kap 厝邊和好，Ivan m̄-na 聽未落去老父 ê 苦勸，顛倒 jú 來 jú 厲害。有一工暗時 Ivan tú 好行到外口，發現 nî-chîⁿ 下小火 tē 燒，同時有一人 tùi nî-chî 腳行出來，Ivan 認出是厝邊就追去。伊 tē 追 ê 時火燒到厝頂，kā 兩家厝宅攏燒了。Ivan ê 老父雖罔互人救了出來，卻 beh 死 beh 死。臨終 ê 時伊 koh 再要求 kiáⁿ 要原諒厝邊，kiáⁿ 最後醒悟，卻已付出極高 ê 代價。Chit-ê 故事點出控制情緒 ê 困難，Daniel Goleman 佇所著「EQ」冊中提出：「IQ 高，無一定會成功，Kan-taⁿ EQ 高 chiah ē 有成就」。EQ 就是情緒商數，是瞭解情緒、控制情緒 ê 能力。咱 ê 學青團契除了查經外，mà 舉辦 kúi 場牧會關懷 ê 講座，是希望 ē-tàng 增加 EQ，學習瞭解別人，控制家己 ê 情緒，有效率關懷別人。

雅各佇第一章指出重點信息：「恁著做行道理 ê，m̄是 kan-ta 聽 ê，來家己 (1:22)。」伊舉一 ê 例：「佇講話無跋倒 ê，就是做完全 ê 人，也會約束伊通身軀。」(3:2) chit-ê 信息簡單明瞭，真清楚警誡咱講話應該著謹慎，因為嘴話會影響咱 ê 一生。今仔日 ê 經文是對四方面控制咱 ê 話語。

1. 無應該講別人 ê 閒話：閒話是關係別人私生活謠言，閒話有曖昧 ê 色彩。有時咱認為毋是講閒話，是出佇關心，提出互大家代禱、關懷。設使確實關心別人，祈禱應保密。傳播謠言，表示對人 ê 不尊重 mà 無愛別人。疼厝邊，就是 beh 先尊重 In。有時對別人聽著一寡閒話，咱應該著停止放送，互閒話無 koh 流傳。箴言 26:20-22『無人學話，相爭就 soah 去。學話 ê 人 ê 言語親像好食 ê 物；深入人 ê 腹內』。現在台灣有聲媒體已經陷入真嚴重爆料，互真濟有見識之士感覺應該關電視。咱對台灣無社會公義 ê 媒體感覺真厭惡，所以咱要常常警醒家己 mà 陷入全款 ê 錯誤。

2. 知影應該行善 m̄ 去行 ê 就是罪(4:17)：台灣人 ê 文化是「隨人顧生命」，所以 chiah 會對社會 ê 議題或是 bò 公義 ê 代誌攏保持恬恬。這期公報刊一篇文章，作者佇美國排隊時忽然有人插隊，有一美國人就大聲制止伊，互插隊者退去，伊真佩服 mà 真想 beh 學。總是轉來台灣全款情形，伊卻選擇恬恬妥協。恬恬其實 mà 是一種語言，有時陣應該講無勇氣講，這是 m̄ 著 ê ! 大部份 ê 人對佇得罪上帝願意認罪悔改。總是得罪人，應該向人道歉 ê 時，選擇恬恬或是 m̄ 去 chhap, 因為驚 bò 面子，或是得未著對方 ê 諒解。這需要勇氣學習。尤其是關係愈親 ê 人，koh 卡需要按呢。撿採是對方代先 m̄ 著，咱也著學習原諒。馬太 5:23-24 節講『你若 teh 獻你 ê 禮物佇祭壇，也佇 hia 記得你 ê 兄弟有甚麼 hiáp 嫌你；著佇 hia 放下你 ê 禮物佇壇前，事先去 kap 你 ê 兄弟和好，然後來獻你 ê 禮物。』總是有時恬恬是 kā 代誌擔落來，tú-chiah hit 位 Ivan 佇接受法官問 ê 時，選擇保持恬恬，無供出放火者，選擇饒恕對方，厝邊對 án-ne 見笑悔改，以後兩家和好親像以前同款，重建 ê 時，厝 mà 起連作伙。

3. 咱佇話語上盡量無過失：就是適時講話，這是一件真難 ê 代誌。譬親像：講話有時要注意交情，交情卡好 ê，thang 講卡深 ê sng 笑，若交情無夠就不使亂講 sng 笑。講話 ê 場合 mà 真重要，有一位憨 kiá 婿平常攏講不著話，有一擺去參加丈人 70 大壽，出門前太太再三交代伊宴會時 mà 講 bò 吉祥 ê 話。伊果然無講話，不打算佇告辭時，擋 bē 著講：今 á 日我攏無講 bò 吉祥 ê 話，今晚設使你 nà 破病 kap 我無關係。話一講出互丈人岳父氣 ka 半死。

4. 基督徒言詞要積極：Norman Vincent Peale 是前 RCA, New York 市, Marble Collegiate 教會 ê 牧師，一直提倡人愛有積極 ê 想法。伊創標竿雜誌，內容攏是積極勵志 ê 文章。按呢 mà 影響濟濟人，講鼓勵人 ê 話是非常有利益 ê。伊寫 ê 冊仔台灣 mà 翻譯作中文，非常暢銷，幫助濟濟人，mà 送到監獄互犯人讀；有人生 ê 光明面等 18 本。我識讀一篇文章：有一 ê 中學校長請一位僑領來演講。當這又矮又大塊 ê 僑領一擺一擺 chiūⁿ台，無小心跋 káu 四腳向天，同學攏大笑，校長著急 m̄ 知如何是好。最後僑領慢慢行 chiūⁿ台，只講了一句話：人生跋倒是常事，每擺跋倒我爬起。作者講：伊深受按呢簡潔有力 ê 演講感動，了後每擺 tú 著挫折，伊就用 che 勉勵家己。咱講話也著互人向望。無論情況是 jōa-nih bái, 咱攏 mài 悲觀，猶原心存向望。前幾工看著報導講樂觀 ê 比悲觀 ê 人長歲壽，tú 好應驗耶穌講 ê：甚麼人會用掛慮互生命卡長一刻久(太 6:27)？

舌雖罔佇咱 ê 身軀中非常小，E-thang 互人性裡 ê 敗壞煽動起來污穢全身，所以千萬 mài 傳話以免傷人。「舌 péng-來 péng-去-ê 陷落 tī 患難。(箴 17:20)。」講話 péng-來 péng-去-ê 最後會 kã 家己陷佇災禍。保羅愛咱用疼心講誠實話(弗 4:15)，其實講誠實話並 bô 困難，總是重要 ê 是有疼心 bô！求主幫助咱，學習要作完全 ê 人，卡 mái 講話，卡濟祈禱，mài 傳話，致使傷害別人，愛 ã-tang 給人回失禮，kap 人和好 ê 話語~驚濟，傷害別人傷害家己 ê 言語愛控制。講話進前先看你 beh 講 ê 是什物，加講造就別人 ê 話。「講話合宜，親像金 ê 蘋果 hē 佇銀 ê 藍仔 (箴 25:11)。」基督徒 ê 講話 ã-tàng 顯明出上帝 ê 慈愛 kap 向望。